

大洞經

鼎信仙觀

又香讚

道延海會 鬱羅蕭臺 金童玉女兩邊排

香花滿金階 賜福消災 眾聖降臨來

賜福消災 眾聖降臨來

淨心神咒

太上台星 應變無停 驅邪縛魅 保命護身
智慧明淨 心神安寧 三魂永久 魄無喪傾
急急如律令

淨口神咒

丹朱口神 吐穢除氛 舌神正倫 通命養神
羅千齒神 却邪衛真 喉神虎賁 氣神引津
心神丹元 令我通真 思神鍊液 道炁常存

玄蘊咒

雲篆太虛 浩劫之初 乍遐乍邇 或沉或浮
五方徘徊 一丈之餘 天真皇人 按筆乃書
以演洞章 次書靈符 元始降下 真文誕敷
昭昭其有 冥冥其無 沉疴能自痊 塵勞溺
可扶 幽冥將有賴 由是昇仙都

大慈大悲愍眾生 大喜大捨濟含識
相好光明以自嚴 弟子至心皈命禮

孚佑帝君讚

三品一理 萬化歸真 人仙幽局
一道同昇

玉皇大天尊 玄穹高上帝

(三)

尋聲赴感 太乙救苦天尊
九天應元 雷聲普化天尊
玉虛師相 玄天上帝 金闕化身天尊
玉清文昌 大洞仙經

序經章第一

道言 昔在龍漢劫初 元始天王 出大洞玉
經 於高上玉清宮 命吾演太玄次玄之道

(四)

吾自是勤誦不輟 元始天王 見吾求道心誠
遂以太玄之音 流響玉清 宏大帝德 合一之
道 示九統之法 傳九光之符 吾不敢自私
因公之世 人能誦之 自然萬神歡慶 萬靈護
持 萬神感格 萬仙翕臨 可以飛度三災
四煞 五鬼 六害 七傷 八難 九厄十惡
立望登仙人聖 不待有所作為 而自無不為也

(五)

苟不誦之 善念泯滅 惡念日增 何以登仙
入聖乎 凡能宏施功德 廣刻經文 普施天下
則 玉帝降臨親迎 不獨可以榮本身 歷
代遠祖 歷代宗親 俱可超昇 而更生矣
世胄接仙 長為貴人 功滿道備 骨肉同昇
乘龍駕雲 上朝玉清

(六)

序事章第二

元始天王曰 真陽帝賓老 受事會玉皇 滅
魔除穢尸 百司詣絳宮 逸宅丹玄內 五炁
結十方 七轉司命至 三回召仙公 泰山主
鬼者 急校三官中 十德初成基 同飛七覺
元

(七)

序理章第三

元始天王曰 清靈扇八極 鼓輪三華城 披
此胞胎結 六祖受福生 辰宿皆衛道 常守
帝一營 公子執五符 太乙居紫房 三合永
不紊 拔昇玉帝宮 少女郁墨子 預兆一氣
中 拘制精血液 盈滿五臟充，十真登紫房
帝子化金仙 白玉飛符召 引昇龍臺天

(八)

序源章第四

元始天王曰 紫精毓華林 長眠太無外 玉
房生寶雲 九扇胞胎內 帝賓奉玉符 三光
回紫蓋 蒼玉斌來生 衛此長夜會 五靈度
符籍 九統合九光 太玄居玉清 紫陽發萬
生 玄精育九靈 元父結胎仙

(九)

詳源章第五

高上洞元 元生九天 炁祖太无 眾風映玄
曾親絕散 四清覩閒 帝一上景 連眾攝烟
長契一運 七世投閒 記靈屬命 華灼自然
流輝六曜 泯邈沉遷 凌梵御暉 西華彰安
併編帝簡 盡得解源 胎田邃路 世發玉蘭
靈光八輝 萬神俱生

(十)

入門章第六

元始天王曰 高上宴紫清 五老輔玉根 太
素拂渺景 合符帝一尊 白帝皓育獎 回金
太霞卿 度我死戶閉 拔出三途昇 十通由
斯生 妙行由此興 洞明光景中 帝一真玄
經

(十一)

求道章第七

元始天王曰 玉虛順玄歸 天晨金霄遊 朗
朗生帝境 頃爾駕玉洲 左撫命神童 右弼
命書符 明真煥九霄 三日映玄敷 千景併
生矜 內有幽寥无 令我得長年 千劫始一
周 黃籙保劫仞 披錦入神邱 太一務命根
公子召合符 十回度初心 得人大信根

(十二)

守道章第八

元始天王曰 玉帝玄上旛 製命九天玄 七
覺乘妙道 歡熙神風還 飈燦北停華 紫英
列東班 琳和九霄外 玉符徵太玄 三素生
泥丸 發耀金靈間 元君誦萬篇 一心守衛
專 十善生玄中 度厄而自然

(十三)

序經章第九

道言 爾時元始天王 眉放青毫 頂旋紫炁
萬華如蓋 浮羅覆形 金光照耀 絢爛光輝
由是吾見吾師如此 乃愈思精進 而功行
大成矣

(十四)

保元章第十

元始天王曰 太真統九炁 洞景寄神通 玉
帝乘朱霄 綠霞煥金墉 上館雲珠內 仰接
無極中 靈關太漠下 靄靄竟沖空 冥化混
離坎 一玄寂大空 寂寂高洞上 玉宸保大
洞 西拔六祖根 南解累劫凶 體矯萬精波
神王攝十方 大歸返胎元 三合乘天龍

(十五)

明元章第十一

元始天王曰 紫精大炁中 三元上景衢 秀
朗大寶輝 昭昭扇帝敷 伯史啟三素 帝臨
登玉虛 慶炁育五雲 司命神明初 十華妙
行仙 制魔生六明

(十六)

通微章第十二

元始天王曰 太玄天地通 浮雲散碧空 神
宗理靈襟 龍山秀玉峰 金房鬱明霞 九天
為高宮 黃庭涉北元 元父在回明 朱晶啟
明師 幽寥登上清 參透玄中妙 長保大洞
經

(十七)

通微二章第十三

元始天王曰 辰中五景炁 三秀登霄庭 滄
臺飛羽輪 迎延道已成 司命奉帝書 號曰
玄度卿 保生大霞宮 列賓館玉清 命門合
津延 守我身常寧 左携元數君 右携朱鬱
靈 太玄度迷覺 遍施大洞文 紫華領胎仙
元命真中神

(十八)

通微章三章第十四

元始天王曰 金闕上景炁 十方暉紫煙 三
合太一尊 帝招太元神 七轉召嶽真 玉符
告三官 拔籍三途下 受生高上辰 太帝八
靈王 一化回慶雲 桃君守六合 謹精衛泥
丸 太清八景觀 十德真文宣 保守神中神
元命生自然

(十九)

度厄章第十五

元始天王曰 太素三華炁 晨登廣寧堂 玉
京表玄籍 守命核道康 回風散萬魔 金符
超廣鄉 撫御地下戶 保守長生王 轉入上
仙門 八景齊洞陽

(二十)

明洞章第十六

元始天王曰 皇上超无景 輪轉九曜停 回
風混帝心 八景運常寧 廣霞參神天 五帝
散日精 液逸元中膜 血凝五華平 體寶圓
珠映 流曜瑩光形 號為壽逸阜 亦曰澄源
亭 俱滅三惡機 啟籍登大明 令我保仙真
仙授披綠青 解禍冥途中 祈福超上靈

(廿一)

度世登玉卿 累祖返胎嬰 洞觀无礙空 元
始通其明 驪珠現真形 內外洞照清

序經章第十七

道言 爾時元始天王 以大洞高上混洞太
无元 天寶地靈之炁 結一寶珠 名蒼胡頡
曰吾以此寶 從道妙一 善貸生根 孕玄分

(廿二)

元誕始傳真 他生萬物 凝成一炁 大哉至
寶 惟我獨存 今為玉宸道君 重出斯寶諸
天帝王 天真大聖 瞻望寶光 其光輝燦爛
分而敷之四方 遂凝聚結為彩雲 煥為詞
章 由是百千億萬 結成大洞仙經文光 因
會諸天帝王 天真大聖 以清明識 以始通
觀 以華灼通 齊聲宣詠 大洞雲章 音徹諸

(廿三)

天流響九地 稱名神鄉 一切神靈 不離本
座 朗誦雲章 日覩之而絢爛 耳聞之而稱
揚 其下有懶惰之人 皆由百生障滅 萬劫
塵埋 一旦光音所及 遂於一時頃刻間 脫
離苦海 故雖日見耳聞 終成渺渺 於是太
元道父前詣蕭臺 再拜稽首 求授寶珠 所
結大洞經文 俯賜凡間 庶以導化生眾 令
其各遵經語 俾免萬災 宏誓願言 殷勤啟

(廿四)

請元辰大聖 玉宸道君 乃親付太元道父
蒼胡頡寶珠 並告太元道父曰 此寶久秘
於吾幾欲重出 不期上智無幾 下愚最多 不
知悔悟者 十之九 知悔悟者 百無一 吾故
未輕出也 今幸有爾太元求請 吾故又授之
惟願弟子鄭重此寶 備述其源 不必問凡與
聖 祇一化他為善 是吾之願也矣

(廿五)

通明章第十八

元始天王曰 太陽化五辰 紫霄歸玄路 元
君保容重 守胃塞死戶 金符煥北華 玉宸
拔六度 帝真灌上昇 斷息三途苦 洞明清
靜光 帝心大神通 命宿出自然 根本原由
中 未來及他心 一切无礙融 洞源興洞明
萬道由通生

(廿六)

還元章第十九

元始天王曰 養精上華炁 太微玄景童 神化
玉室內 飛羽逸紫空 日為三才貴 奉符照地
中 開關把金節 閉戶扣瓊鐘 滅魔三艷野
招靈上清宮 冥冥窮陰關 聚精六合中 及老
變皓形 髮白返童容 洞源清淨光 操持有其
功 咽液生萬神 神水華池融 湧泉灌而潤
往來無有窮 成道周而始 天根常茂豐

(廿七)

化幽首章第二十

元始天王曰 玉宸九天司 太上大道君 九
回鏡中清 常保向化人 解帶玉映室 乘景
入四明 提撕日中主 勤宣月中神 太一召
天魔 帝君校萬精 拔擢死籍炁 越度仙黃
庭 帝立三關上 八風舞神兵 洞微無窒礙
化及眾幽靈

(廿八)

化幽二章第二十一

元始天王曰 太清浮絕空 三天保神符 日
中開五暉 大地恩無窮 捧籍登大明 受籙
金華樓 五臟植玉根 炁通生清明 定和妙
明覺 玄息自長生

(廿九)

化幽三章第二十二

元始天王曰 太極元景王 拔出一切魂 九
玄解重劫 六合得上昇 徘徊秀華下 俯仰
化五靈 飛仙昇玉堂 形神回孩嬰 洞虛清
和靜 通華引玄明

(三十)

化幽四章第二十三

元始天王曰 无極真仙機 洞中保元炁 正
位左右仙 長生虛靈世 洞有五符籍 玉宸
得合一 魂生太元中 魄受吾道密 從茲化
幽無 七炁永无滯 靜真明至理 至老長不
易

(卅一)

結經章第二十四

玉宸道君 初定通息 太和一千 中觀變真
離相清塵 元合五千 坐在立亡 大定全真
妙行通靈 初曰通炁 次曰通神 終曰通靈
萬通成真 道備登宸 超脫飛昇 過度三界
往來三清 正品大洞 天一帝尊 六度萬通
功圓行成 千和萬合 自然成真

(卅二)